

Timóteo Paulõ ha katxu kene bumanikiaki

2 TIMÓTEO

Paulõ Timóteokiri xinānikiaki, na hātxarā

1 ¹Ea ã Paulorā, Deusũ haska xinaĩwẽ Jesus Cristõ kuxipaya ea wakinā, hawẽ yunuawẽ ea aniki. Haska wakinā, hamẽ ea akama hakia haska bebũkiri Deus yubakani hawẽ hiwea keyuisma ikibi ikakiri haska xinākubaĩmis haska hayawẽ taeshũ Jesus Cristo ea katumaniki. ²Timóteoõ, ã mia kene bumai uĩrawe, mĩ Jesus Cristo ikũwaĩwẽ taea mĩ ã bake kayabi keskakirā. Nukũ Epa Deus inũ nukũ Shanẽ Ibu Jesus Cristo miwẽ nuikĩ hau mia unānuma hiwemakĩ pewakĩ duawapakekubainũbũwẽ.

**Paulõ Timóteo pashkabiranimashũ Deus
kẽwāshũkubainikiaki, na hātxarā**

³Punu nuka huĩti nixma mĩ baxikuimakẽ mia xinākĩ hanu ã Deusbe hātxaitiā bariri inũ mexu tibi mia hakimama mikiri Deus kẽwākĩ ã mia yukashũkubaĩmiski, eā Deus duawakinā. Haska ã xinā hawa txakabumakiri ea xināmaya ã akubainaii, haska nukũ shenipabũ Deus ikũwākĩ apaunibu keskari wakinā. ⁴Ë mia pashkabirana mĩ ewẽ nui kashaya nenu huimashũ ã mia xinā heneamaki. Haskawẽ taea ana miki nukutā ã mia ana uĩ miwẽ ã benimakatsis ikaii. ⁵Ha dukũ mĩ txitxi Lóide inũ mĩ ewa Eunicẽ Jesus Cristo ikũwāni txĩtuĩsbuma keska habias xinā miāri mĩ ikũhairawakĩ mĩ xinā mĩ betsa watiruma ã unaiĩ.

Jesus Cristokiri yusĩ daketimakiaki, na hātxarā

⁶Haskakẽ natiā ã mia yunukĩ yuairā, nĩkairawe. Deusũ hawẽ kuxipa pepa hau mia inākĩ kayati wamanũ mia mamepishũ ã mia yukashuniki. Habiaswẽ ana kuxipai txi ketiābu hi imis keskai ana mĩ kuxipa babu

wayamawe. ⁷Deusū hawē Yushī nuku inākī yushī babu dateti nuku ināma iniki. Hakia hawē Yushī kuxipa pepa inū hawē abui nuinameti inū hawē nukūmebi nū pepakī xinātiru nuku ināniki. ⁸Mia haska washuniwē taea nukū Shanē Ibukiri yusī hakiri hātxai haki dakeyamakūkaīwē. Ha dikabi, hawē taeshūri nenu ea bitxiabuwē taea ewēri taea ekiri hātxairi ewē dakeyamariawe. Dateama eskakūkaīwē. Deusū nuku kuxipa wakubaīmiswē taeshū Jesus Cristo mekenākiri kakape nū hatu yusīayā nuku itxakawaibuwē taeshū miari bika tenemabiabu hatuwē dateama Deusū kuxipayashū yusīkī heneyamawe.

⁹Eska Deusū bebūkiri xinānirā, hawara pepa nū amiswē taema hakia haska Deusū na mai anu hawa wariamahairabia bebūkiri hawē xinā duapawē taeshū hawē hātxawē hiwei nū hawenabu meribi pepakubaīshanūbū nukū txakabuwē nuku kupikatsi ikama haska yubakaniwē taeshū tsuabūra Jesus Cristo ikūwaību nuku katukī kenanishū natiā nuku ma mekekubainikiki. ¹⁰Hanushū txanima Deusū hawē nuikipa nuku unāmakinā, hawē bake Jesus Cristo nukū mekenāwākī mawawē dasibibu nū datemis hatū maemakī nuku binushuniki. Ha kakape hakiri hiwea hātxa yuikī datā ati xara ana huneama wakī shabakā tashnimakī shabakabi waniki.

¹¹Haskawē taeshū Deusū ea katutā hawē bakekiri kaka pepa judeubuma ē hatu yusīkubaunū ea yunukī Jesusū kuxipaya ea wanishū ea yusinā waniki. ¹²Ea haska wanikē Deusū hātxa ē yusīkubaūmiswē taeshū itxakawakī ea bitxibiabū ē Jesus ikūwākī taewaya ea mekenitū bari hawē heneaitiā ea mekekubaīshanai unai ē dakeamaki. ¹³Jesus Cristo nuku ishuniwē taea ikūwaī abunamekī ē mia yusīmis keska wakī hātxa kayabi kayatapia yusīkī heneyamawe. ¹⁴Haska wakī Jesuskiri yusīa mī tapīni hau tsuā betsa wayamanūbū Deusū Yushī Pepa nukuki dasiatū mia merabewaya hawē kuxipawē uīrakubaīwē.

¹⁵Haska inū, mī ma unaiī. Ásia mai pakea anuabū Jesus ikūwaību dasibi eki dakei eki petxitā ana ea merabewabumaki, Fígelo inū Hermógenes dikabitunā. ¹⁶⁻¹⁷Ea haska wabiaibū nenu Roma anu ē bikai hiwebiakē nukū haibu Onesíforō Roma anu hikituxitā hawa huīrukuāma ea betxinū ika ea benatxakayamakī atimas ea betximaki. È mane dispi txiwetameyawē ē meneshekeaki dakeama hawētxais ea merabewakī ea xinā txākāwābirābiranimaki. Ea haska waimakē Deusūri hawenabuswē nuikī hau hatu merabewakubainūwē. ¹⁸Éfeso anushū Onesíforō nuku merabewakubaini mī unāhairaii. Bari hawē heneaitiā Deusū yurabu hatu unāti waitiā nukū Shanē Ibū hau Onesíforo duawashanūwē.

Soldado pepa keskatikiaki, na hātxarā

2 ¹Mī ē bake keska Jesus Cristoki dasia mī hawē kuxipa hayanū Deusū hawē pepa mia inānirā, hawē besti kuxipakūkaīwē. ²Itxapabu ē

hatu yusĩkubaunai mĩ nĩkakĩ tapĩmisshũ akai keskari mĩ hatu tapĩmairã, ha hunibu pe hiwekĩ ikũhairawai txĩtuãma hatu uĩmai duapakũkaĩkĩ yurabu yusĩkĩ hatu merabewatirubu hatu katutã hau habiaskari yusĩkubainũbũ hatu yunukubaĩwẽ.

³Hamẽ mia ikirã, soldado keskai hiwewe. Haskakĩ ẽ ikai keska hiwekĩ Jesus Cristo mĩ ikũwãyã mia itxakawabiabu Jesus Cristõ tsuma pepai nuitapabiai bika tenei hiwekũkaĩwẽ. ⁴Uĩwẽ. Txanima soldado unãnepatũ hawẽ shanẽ ibũ yunua besti dayashũkatsi hawa hamebi hawẽ xinãnẽ abuai atirumaki, hawẽ shanẽ ibu besti benimawanũ ikarã. ⁵Ha dikabi, habiaskariai, bola putanika beyuskĩ hawẽ yunuti inũ hawẽ nemati txibãbuma hawẽ manakuti pepa hayatirubumaki. ⁶Ha inũ, huni betsã yunu banaima hawẽ dayashunikã mekeshũmiswẽ taeshũ hanu tsekatiitiã bai ibuã tsekakĩ hawena dukũ biama ha dayashũmis pashkashũkĩ hawena dukũ inãtiki. ⁷Na haska tibikiri ẽ mia yuiã xinãkubaĩwẽ. Mĩ haska waya nukũ Shanẽ Ibũ mia merabewakĩ dasibi mia tapĩmashanikiki.

⁸Nukũ shenipabu shanẽ ibu pepa Davĩ baba Jesus Cristo mawa Deusũ ana bestẽwani kaka pepa datã akĩ ẽ hatu yusĩmisrã, hakimama xinaĩrakubaĩwẽ. ⁹Jesus Cristokiri ẽ yusĩkubaũmiswẽ taeshũ ea itxakawabu tenekĩ ẽ meaii. Huni atimapa hawaki dateama txakabuwai betxitã amisbu keska wakĩ ea nemakĩ mane dispiwẽ ea meneshabu keska wariakĩ Deusũ hãtxa kakape yuikĩ ẽ datã amisrã, ha tsuã nemakĩ neshatirubumaki. ¹⁰Haskakẽ tsuabura Deusũ katunibu Jesus Cristo ikũwaĩ pepai hau hatũ txakabuwẽ Deusũ hatu kupiama hatu pashawakĩ piskuma hau hawẽ kuxipa ikibi ikanu hau hanu hiweriashanũbũ natiã ea hiweyushũ ẽ hatu bika teneshũyuai.

¹¹Na haska ẽ mia yuiairã, txanimahairaki. Xinaĩrawe.

Tsuabura nũ ma habe mawani keska habũ nũ xinaĩburã, habusri nũ habe hiweshãkanai, niti ikamarã.

¹²Tsuabura Cristowẽ taea nuitapabiai babuama kuxipakĩ nũ binukubainaiburã,

txanima hanu shanẽ ibuã anu habe nũ shanẽ ibushanai.

Hamẽ tsuabũra hakiri txani peama yui keyaĩsbumarã,

habiaskari Cristo hatukiri Epa Deus txanikĩ hatuki dakeriashanikiki.

¹³Hamẽ nukubu nũ xinã betsa betsapa wai txĩtũbiamiskẽ

hatunã, hawa xinã betsa betsapa waisma ikũkaĩnũbarikiki,

haskatã hamebi ibubis txani txakatirumarã.

**Paulõ yusĩmis keska wakĩ hau Timóteõ
ariakubainũ yununikiaki, na hãtxarã**

¹⁴Ë mia yuiã keska xinãkĩ betsabu hatu yusĩkĩ tapĩmairakubaĩwẽ. Deusũ nĩka keyuaya yusĩã betsa betsapakiri yui hau kenameyamanũbũ hatu nemakubaĩwẽ, tsua hatu merabewatirubumakirã. Haskaibu tsuãra

hatu nīkai e ishākanikiki, Jesus Cristo ikūwāpairā. ¹⁵Hamē mia ikirā, hī hī ikama mī Deus dayashunairā, Deusū besuubi hawa berabini mī dakeama ishanairā, txanima hātxa Jesus Cristokiri dasibi hatu yui pepakūkaīwē. Mī haskamiswē taeshū Deusū mia unāti wakī: “Huni dayakapakūkaīkī mī ea dayashūmis peki”, iwanā, mia yuishanikiki. Xinaīrakubaīwē. ¹⁶Tsuabūra hātxawē besti hamapai bemakis pepakiri xinaī kenamei hātxakī haska bestikiri xinaību tsuabūra hatu nīkai hatū yusiawē beyai shushatirumai atimapai pikukubaīkanikiki. ¹⁷Hatū yusiānā, isī txakabu tashni su ika ewakūkaīmis keskaki. Haska keskari wakī hatū yusiawē yurabu yusikī hatunabu txakabu pa wamakanikiki. Hatu uīrakubaīwē. Haska keskai Himeneu inū Filetō hatu txibākī ¹⁸txanima hātxa henetā ma hamakiri hatū xinā benuabuki. Habū hatu yusikī yuikinā: “Ikūwaību mawarā, ana bestēshanairā, nū ma hayaki”, iki mapubaūkī hatu parākī Jesus ikūwaī hatiri hatu txitūmakanikiki. ¹⁹Hatu haska wabiabū ma meribi Deusū hawenabu kuxipa wakī mestēwani hawa ana betsa wama ishanai ma Deusū hātxa kaneama kenenibu hayaki. Haskakē: “Nukū Shanē Ibū haratura hawenabu ma unaīkiki”, ha inū: “Tsuabūra nukū Shanē Ibū kenawē Deusbe hātxakinā, hatū txakabu txitetā hau henekubainūbūwē”, ariani kenenibu hayaki.

²⁰Haska inū, huni mabuyatū hiwe ewapa merā hawē mabu tibirā, ouro inū prata hawērua besti hayamaki. Hakia ha dikabi hi mabu inū mai mabu pepa beshmas hayariki. Ha mabu dabe haska keska daves hayamaki. Betsa hawa husiama hawē pepahaira besti atiki. Hanua betsa hawē hamapai wakī pepa beshmas dasibibū metirubu hayariki. ²¹Ha mabu pepa ouro keskarā, tsuabūra txakabu henetā hawē Shanē Ibu pepakī dayashuni hawa txakabu husikī ana meama ha besti pepashunaiwē taeshū hamapai daya pepa betsa betsapa hawē Shanē Ibu Jesusū yunutiruki.

²²Haskawē taeshū berunābu hamapai tibiwē kemumisbu keska henetā hanua ana haska hiweama pashakūkaīwē. Eska besti wē hiweti pepa benakubaīwē, hawa txani txakama inū, Jesus Cristo ikūwaī inū, nui abunamei inū, unānuma hiwei dasibibu huīti shūpībubeta nukū Shanē Ibu kēwākubaīkinā. ²³Ha dikabi, unaīsmapabu kenamei sinatanamemisbuwē taeshū hatu nīkayamakubaīwē. ²⁴Nukū Shanē Ibu dayashunikabia nukū beyawē hamakiri hātxawaī detenamei keskai nū maputirubumaki. Hamē nuku ikirā, dasibibube pepairā, dasibibu yusiāni xarairā, dasibibu hawara kaneai bu hawaira hī hī, iwanā, hatu txakabu wama hiwekūkaītikī. ²⁵Tsuabura nīkaisbuma inū patapabu mī hatu merabewakī pewakatsis ikairā, huīti babutā hawa sinatama eska xinākī hatu unāmakubaīwē, Deusū hawē txakabu unāma xinā betsa watā: “Haskarā, txanimakī”, ikī hatū txakabu henetirubu manakinā. ²⁶Mī haska waya habu diabo Satanāsā hatu beya wakī tsumawani habū mia

nemakubaixinabu besteã keskatã kaïkaïkĩ Jesus Cristokiri txanima hãtxa unãtã ana txakabu wakatsi ikama habũ Satanás mepãmabaïtirubuki.

**Ma bari hawẽ heneaitiã yurabu haskashanaibu
Paulõ yuinikiaki, na hãtxarã**

3 ¹Hanu Jesus Cristo ma ana hua kemaya bika betsa betsapa kaïbirãshanairã, mĩ ma unãĩ uïrakubaïshãwẽ. ²Ha yurabu eska bestiwẽ hamebi kẽkĩ hatũ mabu inũ hatũ pei bestiwẽ kemui: “Earã, tsua ea keskamaki”, ikĩ Deuskiri hãtxa txakabukĩ hatũ ibuã hãtxa nĩkama inũ, hawa pepa xinãma inũ, Deus kẽwaïbuki meseama txakabushãkanikiki. ³Yura betsabu duawatikiri xinãma inũ, hawa hatuki nuitimakiri xinãma inũ, yuãnanãti besti xinaĩ inũ, hatũ hiwea mekekĩ pewama pubẽ besti xinãkĩ hawara pepa Deusũ abumis danaĩ haki sinatashãkanikiki. ⁴Haska inũ, betsarã, yura pepabu tsuabura hatuki sinataibu hatũ hatu unãmamĩ inũ, hawara itiru bebũkiri xinãma hamapai amisbu inũ, hamebi kẽkĩ xinãkĩ: “Yura betsã atirumabiakẽ eã besti ẽ atiruki”, iwanã, xinaĩ inũ, hawẽ kemu pae bestiwẽ xinaĩ pe hiwenũ ika Deus benakĩ xinãma iriashãkanikiki. ⁵Hatũ keshawẽ bemakis shabakabi Deus kẽwãbiakĩ hawa hawẽ hiweawẽ pepakĩ uĩmama Deusũ kuxipaki dakekĩ kẽwã kayabiana danãshãkanikiki.

Haska keskaburã, hatube ketashameama hatu dũkekubaïwẽ. ⁶Hamẽ betsabu ikirã, eskakanikiki. Hatubetã txani yui xaranũ ika aïbuaibu hawa unãma txakabui hiwekĩ kemu betsa betsapa teneai anu hatũ hiwetã hikitã hatu yusĩtxakakĩ hatũ tsumabu hatu wamisbuki. ⁷Habũ hawarakiri tapĩbiakubaïkĩ hawa txanima hãtxa shabakabi nĩka pewatirubumaki. ⁸Huni mukaya dabe Janes inũ Jambresĩ Moisés hãtxa beshtenũ ika inibu keskakĩ habu parananaïbũ txanima hãtxari nemanũ ika ha hunibu hatũ xinã pema inũ ikũ kayabi wama hamakiri kanekanikiki. ⁹Ha parananaïbu unaĩsmapakĩ hãtxa kayabima hatu yusĩaïbu dasibibũ unãtã itxapabu hatuki txiti ikama ishãkanikiki. Haska Moisés beshtenũ ika Janes inũ Jambres tatima ini keskai haburi haskashãkanikiki, beshtekeirã.

Hawẽ henekĩ Paulo Timóteowẽ nuhairakĩ yununikiaki, na hãtxarã

¹⁰Mianã, ha parananaïbu mĩ hatu txibãmaki. Hamẽ haska yusĩ ẽ hiwemis keska mĩ txibãmiski, eska tibi ea txibaïnã. Haska ẽ xinãmis inũ, haska ẽ ikũwãmis inũ, haska hawaira hĩ hĩ ikama ẽ tenemis inũ, ẽ nui abunamemis inũ, hamapai ekiri kaïbiranai tenei ẽ kuxipamis inũ, ¹¹haska Antioquia anushũ inũ, Icônio anushũ inũ, Listra anushũ ea itxakawakĩ ea bika tenemakubirãyamabu mĩ unãĩ keskakĩ miari bika tenemaibu mĩ teneai ea keskakĩ mĩ mekubainai. Ea haska tibi wabiaibũ nukũ Shanẽ Ibuã ea hatu mepamakubaïyamaki. ¹²Hamẽ txanima

tsuabūra Deusū hātxa ikūwaĩ pepakĩ Jesus Cristoki dasia hiwekatsis ikaiburã, hatu bika tenemakĩ hatu nuitapa washãkanikiki. ¹³Hakia huni txakabu inũ habu parananaĩburã, hatũ hiwea pe buama piku bestishãkanikiki, hatu paraĩbuwẽ inũ ibubis parananaĩnã.

¹⁴Haskabiaibũ miarã, Deusū hātxa pepa mia yusĩabu tapĩtã mĩ ikũwãni habiaskas xinãkĩ txibãkubaĩwẽ. ¹⁵Mĩ bakeixta Deusū hātxa pepa meribi mia yusĩkĩ mia tapĩmakĩ hawẽ besti pashati Jesus Cristokiri mia unãmabu nĩkakĩ mĩ ikũwãnirã, xinaĩrawe. ¹⁶Dasibi Deusū hātstarã, hunibũ xinãma Deusū hatu xinãma habũ keneniburã, harã peki. Hawẽ yura betsabu yusĩti inũ hawẽ hatu nemakĩ beshteti inũ, hatu hawẽ pewati inũ, hau hawẽ hiwei pebainũbũ hawẽ hatu unãnepa watiki. ¹⁷Haska yununiwẽ taeshũ habu Deusū yunua hawẽ hātxa yuishunikabu hawẽ hãtxawẽ unãnepakĩ pepahairakĩ Deus dayashũkĩ pepa betsa betsapa ashũtirubuki.

4 ¹Epa Deus inũ Jesus Cristo ha shanẽ ibuhairai hawẽ kuxipawẽ hushũ mawabu inũ hiweabu unãti washanaitũ nuku shabakabi uĩãibũ ẽ mia yunutzakayamai ea nĩkairawe. ²Eska ẽ mia xinãshunairã, Deusū hātxa hatu tapĩmakĩ hawa heneama bari tibi benuama akubaĩwẽ, hanu nĩkakatsis ikĩ nĩka pewaibutiã inũ hanu nĩkakatsi ismabia inũ hanu bika teneabutianã. Haska wakĩ hatu ikũwãmakĩ hatũ txakabu hatu henemakĩ hatu benimawakĩ hatu yusĩ hĩ hĩ ikama akubaĩwẽ. ³Txipu bari betsatiã yurabu itxatã yusĩa kayabi ana nĩkakatsi ikabuma ishãkanikiki. Hakia haska habũ nĩkakĩ abuai besti anũ ikaibu hatũ yusĩa pepamabiakẽ hawẽ benimanũ ishũ hawara haska nĩkakatsi ikaibu besti hatu yusĩmanũ ishũ yusĩnã itxapabu hatu yusĩmashãkanikiki, ⁴Jesus Cristokiri txanima hātxa henei haki petxitã miyui betsa betsapawẽ besti yusĩaibũ txibãkinã. ⁵Hamẽ mia ikirã, dasibi mĩ xinãnẽ mekei pekĩ bika tenebiai Jesus Cristokiri kakape datã akĩ hatu yuikĩ daya pepa ẽ mia yunubainai xinã betsa wama hatu yusĩkubaishãwẽ.

⁶Hamẽ earã, natiã ma ẽ yura Jesus Cristo inãkĩ ẽ mawashũshanai ma kemaikiki. ⁷Earã, Jesus Cristõ soldado pepa detenamekĩ hatu binumis keskakĩ habũ ea itxakawaibu ẽ binuaii. Kuxibaikĩ hatu maemakatsis imisbu keskakĩ haska ewẽ Deus yubakani hawa txĩtuãma ẽ ma ishuãki. Ikũwanishũ hawẽ kakapekiri yusĩ bikabiakĩ ẽ hawa heneama ikũkainaii. ⁸Natiã ẽ dayashũkũkaĩmiswẽ taeshũ haska hayanũ ika ẽ imis ẽ maiti manakuti pepa Deusū ea mekeshũkubaĩmis bari hawẽ heneaitiã hātxa pewanika duapatũ Jesus Cristõ ea inãshanai ẽ manaii. Haska wakinã, ea besti inãma dasibi habũ Jesus Cristo ana txĩtũkirãshanai abukĩ manaiburi hatu inãshanikiki.

Paulõ haibuaibũ haskawaibukiri Timóteoki txaninikiaki, na hãtxarã

⁹Hawa teai bika teneama hawairakirã hushũ ea uĩyuwe. ¹⁰Demas hawẽ hiweawẽ besti inũ mabuwẽ kemukĩ ea henebaini Tessalõnica mae

ewapa anu kaxiāki. Crescente Galácia mai pakea anuri kariaxinaki. Tito Dalmácia mai pakea anuri kaxiāki. ¹¹Lucas besti nenu ebe hiweaki. Hukī Marcos benakī betxitā iweshāwē, mibetā nenushū ea merabewatirukirā. ¹²Nukū haibu Tíquico Éfeso anu ē yunuyuai. ¹³Trôade anu nukū haibu Carpō hiwe anu ē matsi tari ē henebirāyama inū ē una itxapa inū ha shūska mī ha hakimatiruma ē una bitxi sebi ewapa ē baxibirāyama hukī ea keyu beshūshāwē.

¹⁴Mane mabu wanika Alexandrē ea harakiri xinātima kaya wakī ea itxakahairawaimaki. Haskawē taeshū nukū Shanē Ibū haska abuai keskawē kupishanikiki. ¹⁵Nū hatu Jesus Cristo kakape yusimiskiri nuku hatu danāmaikiki. Haskawē taeshū miāri hakiri uīrakubaīwē.

¹⁶Hamē betsarā, ha dukū Roma shanē ibubu nīkamakī judeubū ea kūyā akaibū ē txakabuma ē hatu yuiaya tsuā kerabewai ea hātashunama dakekī dasibi ē haibuaibū ea henebainimabuki. Ea haska wabiabainimabū hatū txakabuwē taeshū hau Deusū hatu kupiyamashanūwē. ¹⁷Ē haibuaibū ea henebiabainabū hawē binuti Jesus Cristokiri hawē kaka pepa hawē pashatikiri ē hatu yui keyuaya judeubuma dasibibū hau nīkanūbū nukū Shanē Ibū ea heneama ea kuxipa washū hatu daewakī mese anua ea piskumaimaki, ea haska nukū Shanē Ibū hatu binumakī inu keneya pītsi keshea keska anua ea binumakinā. ¹⁸Txakabu dasibi nukū Shanē Ibū ea binumakubaīkī hanu shanē ibuai pepa hawērua nai anu ea pashawatā ea mekeshanai ē unaiī. Haskakē niti ikama ha duawakī kēwanākāwē. Haskakirā.

¹⁹Haska inū, hari hiweabu Prisca inū Áqüila inū Onesíforō enabu: “Haska pebumēkaī?” ikī ē hātxa ē hatu bumai ea hatu yuishūwē. ²⁰Corinto anu Erasto baxikuaya ē huyamaki. Ha inū, Trófimō isī teneai Mileto anu ē baxiyubirāyamaki. ²¹Ui matsi inū niwe kuxipa beriamakē manama hawaira huwe. “Haska mī pemē?” ishū Éubulo inū, Pudente inū, Lino inū, Cláudiā nenushū dasibi ikūwaībubetā hatū hātxa mia yunukanikiki. ²²Nukū Shanē Ibu Jesus Cristo mibe nishū hau mia merabewakubainūwē. Ha inū, Éfeso anushū ikūwaību dasibi Deusū hau matu duawakubainūwē.

Hatiski, ē hātjarā.

Paulo